

La schuldada dal papa

In film sin ils chaltgogns da la guardia svizra


A chaschun dal giubileum dals gardists ha la SRG SSR idée suisse realisà l'onn 2006 il film «La schuldada dal papa – 500 onns guardia svizra papala». Il film documentar da radund 55 minutas è vegni emess l'onn da festa da tut ils quatter programs da televisiun nazionals. Sin il DVD pon ins schizunt tsherner tranter sis versiuns linguisticas dal commentari: Las quatter linguas nazionalas, plinavant tudestg svizzer ed englais. Dapi 500 onns protegian catolics svizzers il papa en il Vatican. «La schuldada dal papa – 500 onns guardia svizra papala» dat in'invista esclusiva en il mintgadi da la pli pitschn'armada dal mund. In team da film è stà durant in onn sin ils chaltgogns dals gardists



svizzers per pudair tshiffar muments buns e nauschs or da lur mintgadi. En il medem mument preschenta il film l'istorgia da la guardia svizra dal temp medieval enfin oz.

Felice Zenoni da la firma da produziun Mesch & Ugge SA ha realisà quest regal da la SSR SRG idée suisse per il giubileum da la truppa cun ritga tradiziun ch'è conuschenta sin l'entir mund sco «I Svizzeri». La musica originala per il film ha scrit il pader benedictin Theo Flury. In orchester da sinfonia da 40 persunas accumpogna ils maletgs barocs cun la culissa sonora correspondentia.

La versiun sin DVD cumpiglia plinavant in segund disc da 30 minutas (betg en versiun rumantscha) che cuntogna ils



Cuverta dal DVD «La schuldada dal papa».

MAD

«La schuldada dal papa – 500 onns guardia svizra papala»

1. Da la Svizra en il Vatican
2. Istorgia: L'origin da la guardia papala
3. Ils emprims dis sco recruts
4. Il siemi (collascha d'impressiuns dal recrut)
5. Instrucziun e scolaziun
6. Istorgia: Sacco di Roma (1527)
7. Investgida ed istorgia da la mundura
8. L'emprim gir tras las localitads dal Vatican
9. Istorgia: Mussolini ed ils Contracts da Lateran (1929)
10. La saramentaziun - finalmain gardist
11. Istorgia: Segunda Guerra mundiala ed ils onns 1950/60
12. Istorgia: Segund Concil vatican; il mintgadi dals gardists
13. Istorgia: Il svilup tar la guardia dad oz (onns 1970)
14. Temp liber dals gardists
15. Istorgia: Attentats sin papa Gion Paul II. e sin Estermann
16. Audienza tar il papa
17. Impressiuns finalas da la lavur da la guardia

suardants bonus: «Making of» da la musica dal film; pled da papa Benedict XVI drizzà a la guardia papala; duas produziuns da la musica instrumentala da la guardia papala; ils pli vegls documents da film da la guardia papala.

Marius, il recrut

En il centrum dal film stat il recrut Marius Wüthrich da Selzach en il chantun Soloturn. La camera accumpogna el tras tut las staziuns, dal viadi en il Vatican ed il temp sco recrut fin tar la saramentaziun e lavur sco gardist. Daspera vegnan er recruts da las trais ulteriuras regiuns linguisticas a pled, tranter auter Christian Casanova da Ruschein.

Il film cumenza cun impressiuns dal da chasa, da la famiglia, dal mastern e dals hobis da Marius. Marius raquinta er da sia motivaziun da vulair daventar gardist. Silsunter accumpogna il team da film ils

novs recruts sin lur sgol a Roma e sin lur viadi cun auto en il Vatican. Là vegnan els beneventads ed infurmads davart las singulas lavurs dals gardists vegnints. Ina collascha en furma da siemi lascha reviver anc ina giada questas emprimas impressiuns dal Vatican.

Silsunter preschenta il film differents elements da l'instrucziun e scolaziun dals recruts: il sport, l'emprer talian, l'instrucziun religiosa. I suonda l'investgida ed in excurs istoric che mussa che l'enconuschenta mundura d'ozendi n'è gnanc uschè veglia. Alura accumpogna la camera ils recruts sin lur emprim gir tras ils sulers e las singulas localitads dal palaz papal.

En ina passascha pli lunga dal film vegn preschentada la saramentaziun, il punct culminant sin il qual mintga recrut ha spetgà cun brama. A partir da quel mument en Marius ed ils ulteriurs giuvenis schuldads vairs gardists. I suonda in'invista en il mintgadi dals schuldads: Impressiuns da lur temp liber en il Vatican e sper la mar sco er in'egliada sin las lavurs da guardia che pon er esser magari monotonas. A la fin vegn mussada l'audiencia dals gardists tar il papa, che salida mintgin dad els persunalmain ed als engrazia per lur lavur da guardia e da proteziun persunala.

Eveniments or da l'istorgia da la guardia papala

Alternant tar las singulas staziuns d'instrucziun dals recruts preschenta il film sequenzas or da l'istorgia da la guardia papala. L'emprim excurs istoric preschenta la tradiziun dals mercenaris svizzers en il temp medieval e mussa co ch'igl è vegni tar la fundaziun da la guardia papala ils onns 1505/06. In segund sguard lunsch enavos è deditgà al temp da la Refurmaziun. Ins intervegn che la guardia steva da quel temp sut il commando turitgais e che Zwingli ha vuli clamar enavos senza success tut ils gardists da Turitg. Ils 6 da matg 1527 è lura succedi il «Sacco di Roma». Questa sblundregiada da Roma tras mercenaris tudestgs e spagnols ha custà la vita a 147 dals 189 gardists da quel temp.

Ils ulteriurs excurs cumpiglian films istorics che mussan bain, co che la guardia è sa midada durant il 20avel tschientaner. L'emprim vegnan tematisads ils Contracts da Lateran dal 1929 cun Mussolini. Suentar la dissoluziun dal stadi territorial da la baselgia (1870) ha il Vatican renconuschì cun quests contracts definitivamain Roma sco sedia da la regenza taliana. L'Italia percenter ha confermà la suveranità politica e territoriala dal Vatican. I suondan impressiuns da la Segunda guerra mundiala ed in'intervista cun in

gardist da quel temp. Plinavant vegn a pled il figl dal cumandant Robert Nünlist, sin il qual in gardist aveva commess in attentat l'onn 1959.

Il proxim excurs istoric tematisescha il Segund Concil vatican e las grondas midadas che quel ha purtà. Ils onns 1970 en tut las furmaziuns armadas dal Vatican vegnidas schliadas, cun excepziun da la guardia svizra. Il film concluda cun l'attentat sin papa Gion Paul II. (1981) e l'assassinat dal cumandant da la guardia papala Alois Estermann tras in sutuffizier l'onn 1988.

L'istorgia da la guardia svizra papala

La guardia svizra papala è resortida d'in contract stipulà da papa Julius II cun Turitg e Lucerna il 1505. Engaschada en servetsch dal Vatican è la guardia dapi il 1506. Ella ha la funcziun da proteger il papa, segirar il Vatican e las residenzas papalas e da render servetschs d'onur a chaschun da cults divins. Fin il 1870 ha existì, ultra da la guardia svizra papala, ina brigada cun Caspar Theodosius de La tour sco davos general grischun. Interrupziuns dal servetsch papal hai dà en ils onns 1796–1800, 1809–1814 e 1848–1849. Suentar il 1848 ha la guardia svizra papala cuntinuà a servir al papa sin basa d'in capitulat conclus da la Svizra e da chantuns catolics cun il Vatican. Dapi il 1848 sa cumpona la guardia svizra papala mo pli da Svizzers. Dapi il 1970 è la guardia la suletta furmaziun militara dal Vatican, e dapi il 1979 cumpiglia ella 100 gardists. Premissas actualas per entrar en la guardia svizra papala è: esser burgais svizzer, masculin, avair tranter 19 e 30 onns, esser almain 174 cm grond, nubil, catolic, avair absolvì la scola da recrut e s'obligar da prestar durant dus onns il servetsch papal.

Tenor Lexicon istoric retic

La presentaziun:

Die Soldaten des Papstes. 500 Jahre Schweizergarde. Ein Dokumentarfilm von Felice Zenoni. Turitg 2006.

Dapli infurmaziuns:

chatta.ch/?hiid=820
www.chatta.ch



Papa Julius II, il fundatur da la guardia svizra l'onn 1506.



La saramentaziun.

KEYSTONE